

長春丘真人寄西州同道書

長春丘真人寄西州同道書

大抵修真慕道，須憑積行累功，若不苦志虔心，難以超凡入聖，或於教門用力大起塵勞，或於心地下功全拋世事，但克己存心於道，皆為致福之基，然道包天地，其大難量，小善小功，卒難見效，所以道剎那悟道，須憑長劫煉磨頓悟，一心必假，圓修萬行，今世之悟道，皆宿世之有功也，而不知夙世之因，只見年深苦志，不見功成，以為塵勞虛設，即生退怠，甚可惜也，殊不知坐卧住行，心存於道，雖然心地未開時刻之間，皆有以積累功之未足，則道之不入，如人有大寶明珠，價值百萬，我欲買之而錢數未及，須日夜經營，勤求儉用，積聚錢物，或三千五千，或三萬五萬，錢數未足，而寶珠未得，其積聚錢物應急，休得浪用耳，比於貧窶之家

，雲泥有隔，積功累行者亦然，雖未得道，其善根深重，今世後世，聖賢提挈方之，無夙根者，不亦遠哉，惟患人心退怠，聖賢不能度脫，若不退怠，今世來生，累世提挈，直至了達耳，我無夙骨，雖遇明師，萬苦千辛，至今未了，丹陽長真，皆具夙緣，但十年五載之間，天心即印，我雖未了，所受艱難，亦與常人異耳。

祖師云：凡為道者，先捨家而後捨身，病，即教他病，死，即教他死，至死一着，抱道而亡，任從天斷，斯為至言，學者其審之。

長春祖師垂訓文：

吾教門人後輩知悉，爾等悟士既投玄門之大道，必

通夙世之善根，一證今生之善果，二修屢劫之不墜，實有出世之真心，當遵太上之法律常閱，門人只知道教以度生，不知玄科有禁戒，夫粒米文錢，俱皆大有所關，此迺是世人膏脂，農夫血汗，非用心而難成，豈無功而可受，汝等後代門人，不自揣掠，不肯專修，只說此門無功，便生外境有意或姦盜邪淫，損人利己，或吃酒賭錢，違師敗教，或燒點假術，騙哄迷人，或歸依傍門，毀謗正道，似這等種種不仁，豈是出家所爲之事，且不言吾門後學之過，況天神有過，則遷其位，地祇有過，則降其職，神仙有過，則墜其塵，鬼魅有過，則滅其跡，君王有過，則失其國，臣宰有過，則加其戮，士人有過，則削其名，庶人有過，則略其福，一切有過，惡各有所歸，何況汝等作

孽之者，豈無有報，吾勸後學門人，自當閒處揣心，出家者所爲何耳，只爲勘破塵緣，輪迴生死之苦，方纔進道，豈肯返造愆尤，重增孽債，若能尋思改過，還依初心而行，起意而守，立志進道，下苦而修，法有三乘，各稱前根所積，量力而行，方是出家之道路也。

夫上乘者修真養性，苦志參玄，證虛無之妙道，悟金丹之大理，發天地之正炁，出塵世之冤愆，廣施恩義，多行方便，只候三千功滿，八百行圓，然後身超三界，位列天仙，跨鸞鶴而朝金闕，乘雲霧而赴瓊筵，千真恭敬，萬聖讚歎，魔王伏匿，鬼神欽仰，與天地同體，日月同光，豈不爲出世之大丈夫哉。

中乘者禮懺誦經秉燭演教誦
太上之玄科，拜天尊之寶號，志心志忑於聖前，虔
誠齋戒於廊廟，清淨身心，闡揚大道，一念純真，
常行久操，亦以功滿德就，臨命終時必有天神擁護
，或送轉皇宮，或投生宰府，或作相而位列三台，
或爲君而名登九五，那時，萬民敬迓，四海歸服，
人中殊勝，豈不尊乎。

下乘者建宮蓋觀，印經造像，修橋補路，施茶奉湯
，戒殺放生，存慈善之心，拾藥施財，絕慳貪之妄
，或尊師敬友，接待往來，或愛老憐貧，周濟窮困
，或秉燭誦經，或焚香禮聖，亦待功行，庶完數盡
壽終，即有仙童接引，脫化陽世爲人，生於富貴之

家，受用隨心所欲，一生享福無窮，那時豈不快哉，此是三乘修爲，各有福果相證，若學道門人，汝難禁酒色財氣，四景之好，只可回家還俗，染苦爲樂，任你所爲，隨心所作，豈不脫灑，何必久戀玄門，迷而不醒，造下無端之罪，安逃還報之苦，亦當思想其有夙因者，可以深入，無善根者，可以速退，若是不然，造下加倍，吾深憐憫，爲此訓焉，再有見字回心，聞言轉念，從發丈夫之剛志，速改前愆，勇猛精進，見者醒悟開發，醒悟者，迴光之心也，開發者，返照之意也，如不早覺，必定永失輪迴，常沉苦海，一墮冥途，化爲異類，到此之時，悔之何及，只恐今生過，萬劫沉輪，大道難遇也。